

Vijećnička pitanja

Marcela Ravlija: je postavila dva vijećnička pitanja. Prvo je da li je Općina Kakanj podnijela zahtjev IDDEEA za pristup njihovim elektroničkim web servisima? Agencija za identifikacijske isprave, evidenciju i razmjenu podataka Bosne i Hercegovine pozvala je sve općine, gradove, banke i druge institucije da podnesu zahtjev za pristup njihovim elektroničkim web servisima u svrhu elektroničke razmjene informacija o prebivalištu građana putem sigurnih i efikasnih kanala. Ovim putem Općina i druge institucije bi mogle elektroničkim putem utvrditi mjesto prebivališta svakog građanina, bez potrebe za fizičkom dostavom ispisanih potvrda. Smatra da bi se time unaprijedio kvalitet i učinkovitost administrativnih procesa u korist stanovnika Kaknja i smanjile gužve na šalterima MUP-a. Drugo pitanje je koliko žena je do sada uradilo besplatan ultrazvuk dojki? Napomenula je da je krajem novembra prošle godine Općina Kakanj u suradnji sa JU „Dom zdravlja sa stacionarom“ Kakanj uputila poziv ženama za besplatan ultrazvučni pregled dojki u cilju prevencije i ranog otkrivanja malignih oboljenja dojki. S obzirom da su se žene i prethodnih godina prijavljivale na taj poziv, a nikada nisu pozvane na pregled, traži da joj se odgovori koliko žena se ove godine prijavilo za pregled, koliko ih je do sada pregledano i zašto se čeka dugo na pregled?

Safet Šahman: je postavio vijećničko pitanje zašto su stali radovi na izgradnji stalne trase puta na dijelu površinskog kopa „Vrtlište“ iznad džamije u Donjem Kaknju? Podsjetio je da je taj dio puta po sporazumu davno trebao biti završen. S toga je apelovao da se problem što prije prevaziđe kako se ne bi desilo samoinicijativno protestno okupljanje.

Slaven Katičić: je postavio vijećničko pitanje šta Policijska stanica Kakanj poduzima kako bi se zaštitila imovina i otkrili počinitelji vandalskih djela skrnavljenja nadgrobnih spomenika na katoličkom groblju „Varda“. Podsjetio je da je u proteklom periodu u više navrata bilo slučajeva skrnavljenja spomenika na katoličkom groblju „Varda“, te je pitao da li se poduzimaju adekvatne operativne i sigurnosne mjera da se ova djela suzbiju i otkriju počinitelji?

Predsjedavajući je konstatovao da su vijećnici: Branko Češljčić i Mediha Mamela postavili vijećničko pitanje bez korištenja govornice.

Branko Češljčić: je postavio dva vijećnička pitanja. Prvo je da li je Općina Kakanj do sada poduzela aktivnosti u vezi sa sanacijom propusta načinjenih prilikom gradnje dvorane „Anes Begić“? Rekao je da nije odgovoreno na inicijativu da Općina preuzme odgovornost za propuste prilikom izgradnje dvorana „Anes Begić“ i da izdvoji potrebna sredstva da se ti propusti otklone i šteta sanira, te je s toga pitao zašto nije odgovoreno na pomenutu inicijativu i da li je Općina do sada možda poduzela aktivnosti u vezi sa sanacijom propusta u gradnji dvorane, a da o tome vijećnici nismo obaviješteni. Drugo pitanje je zašto na području sela Haljinići nisu označena imena ulica i kućni brojevi s nazivima ulica.

Mediha Mamela: je postavila vijećničko pitanje da li pri JU „Centar za socijalni rad“ Kakanj postoji tim za kategorizaciju djece, ako postoji da li je u funkciji i kako roditelji da stupe u kontakt sa istim.

Vijećničke inicijative

Vinka Aletović: je pokrenula vijećničku inicijativu da se rekonstruiše put u zaseoku Kalfići. Ta putna dionica je dužine oko 300 metara i nalazi se u katastrofalnom stanju, te je potpuno nepristupačna tokom kišnog perioda. Mještani svojim sredstvima nasipaju tu dionicu poslije kiše. Navela je da su se mještani više puta obraćali nadležnim službama, ali nisu dobili nikad nikakav odgovor.

Marcela Ravlija: je pokrenula dvije vijećničke inicijative. Prva inicijativa je za postavljanje javne rasvjete na pješačkoj stazi uz rijeku Trstionicu, kroz naselje Mlinčić do kapele i groblja. Stanovnici Čatića svakodnevno prolaze stazom, a u tom dijelu naselja nema rasvjete, što otežava kretanje u večernjim satima. Postavljenjem par rasvjetnih tijela stanovnici tog dijela Čatića, ali i svi koji prolaze tom stazom bi se osjećali sigurnije i ugodnije. Druga inicijativa se odnosi na zamjenu kanti za otpatke na poligonu u Čatićima. Stanovnici Čatića su samoinicijativno napravili i postavili kante za otpatke na poligonu, pored osnovne škole, društvenog doma,..... Međutim, te kante su vremenom dotrajale i treba ih zamjeniti.

Predsjedavajući je konstatovao da su vijećnici: Amar Selimović, Branko Češljčić, Elvir Delibašić, Safet Šahman, Adis Mrkonjić i Nerma Aliefendić podnijeli inicijativu bez korištenja govornice.

Amar Selimović: je pokrenuo vijećničku inicijativu da se preimenuje naplatna (izlazna) stanica trenutnog naziva „Lašva“ u novi naziv „Bilješevo“ ili „Donji Lučani“ kako je do sada bilo. Smatra da nije logično da se naplatna stanica zove „Lašva“, jer se ne nalazi u blizini mjesta Lašva, već u blizini navedenih naselja, pa je logično da se po istima i zove, a i vozači bi se lakše snalazili.

Branko Češljčić: je pokrenuo dvije vijećničke inicijative. Prva inicijativa je da se omogući pješacima, naročito djeci, kretanje trotoarom ispred OŠ „Mula Mustafa Bašeskija“. Svakodnevno se dešava da se duž trotoara ispred OŠ „Mula Mustafa Bašeskija“ parkiraju nesavjesni vozači. Roditelji koji dođu po svoju djecu sjede u autu dok djeca izađu iz škole ili čekaju u školskom dvorištu, a ostave auto parkirano na trotoaru. Djeca su izložena opasnosti od saobraćajne nesreće jer su primorana sići sa trotoara i obilaziti parkirana vozila. Druga inicijativa je da se ukloni zasađeno zelenilo i grmovi ispred obilježenih pješačkih prijelaza u smjeru kretanja vozila na glavnoj saobraćajnici. Smatra da je zelenilo zasađeno nepreopisno i u susrotnosti sa odredbama Zakona o osnovama bezbjednosti saobraćaja na putevima u BiH.

Elvir Delibašić: je pokrenuo vijećničku inicijativu za sanaciju puta Halinovići – Planinarski dom „Bočica“.

Safet Šahman: je pokrenuo vijećničku inicijativu za postavljanje saobraćajnog znaka na raskrsnici kod Starog doma: Brnjic – Podborje – Starposli – Hrastovac,....dr, obzirom da sa te raskrsnice vodi nekoliko puteva i jako se teško snaći, pa je potrebno postaviti znakove sa nazivima naselja.

Adis Mrkonjić: je pokrenuo dvije vijećničke inicijative. Prva inicijativa je da se izvrši dodatno postavljanje usporivača brzine u ulici 7. muslimanske brigade na dionici puta od ugostiteljskog objekta „Oaza“ do Veterinarske stanice. Inicijativu je podnio na zahtjev građana koji gravitiraju tom području, a zbog brze vožnje kroz navedenu ulicu i ugrožavanja pješaka. Druga inicijativa je da se izvrši sanacija na poligonu područne škole u Tršću i to: zamjena oštećenih tabli na koševima košarkaškog terena, ocrtavanje terena i sve ostalo što je potrebno kako bi se isti vratio u prvobitno stanje.

Nerma Aliefendić: je pokrenula vijećničku inicijativu da se osposobi dio rasvjete u ulici Alije Izebegovića kod lamele P+4+M, obzirom da četiri rasvjetna tijela na tom prostoru nisu u funkciji, a velika je frekvencija pješaka, te su u blizini i stepenice koje su stalno u mraku.